

*CULURA*

## TRAMUNTU

Trapani mia,  
stinnigghiata nto so' mari  
ch'è 'na vetrina  
'ncrustata di smiraldi!  
L'isuli 'n funnu,  
comu tri cammei,  
sunnun suspisi,  
parinu 'nfatati!  
Lu sulì,  
'na pennula di focu,  
chi tinci 'u celu,  
li nuvuli, 'i salini... !

Datimi tila,  
culura e lu pinzeddu,  
prima c'a sira  
m'arrobba 'stu tramuntu!

## MULINU A VENTU

Firriánu leggi  
li pali du' mulinu.  
E l'ummira,  
chi lu suli  
arrifretti dintra l'acqua,  
disigna un quattru  
sfucateddu e trimulanti  
supra la tila  
di lu vasu.

## RISBIGGHI

Cui, comu a mia,  
a taliari risbìgghi?!:  
Buttuna di rosi  
chi si grapinu o' suli;  
pinziddati di petali nto pratu;  
culura chi 'nsurginu,  
arcubaleni  
o finiri da' timpesta?  
Cui, a cogghiri  
cu manu trimanti,  
vagnati d'acquazzina  
fraguli di pratu,  
russi curaddi  
supra viridi tappiti di fogghe?  
Cui,  
a sentiri nte vini  
lu scurriri leggiu di la vita  
o' sonu  
di li campani da' Primavera?

## CAMPAGNA

Scrusciu, sentu,  
nta campagna, stamatina!

Trattura

chi rumpinu trazzeri:

Vòmmari bistiùna

chi scunquàssanu tirreni;

machini di metjri

vauti comu casi

chi, mancu ti lu dicu,

portanu pi finuti

campi di frumentu.

E...

lu travagghiu di 'na vota?

E...

lu viddanu

chi cu vestia e aratru

assurcava lu tirrenu?

Chi cu fauci 'n manu

mitia lu fruttu

di li so' sudura?

E...

la facci leta di li fimmini  
c'arriuppàvanu li spighi?

E...

lu silenziu di la campagna?

Lu passu

lentu e sulenni

di li viddani di 'na vota?

## PAISAGGIU

Pini, zabbari, 'na mimusa  
e, nta lu sfunnu,  
muntagni e muntagnoli;  
e un lagu picciriddu  
sutta d'un custuni.  
Tetti di casi viddanischi,  
quarchi villetta tra lu viridi  
e lu cilesti di lu celu.  
Nun ci su' scrusci  
e nun ci su' ribbelli:  
sulu canti  
di merri, passari e cardiddi;  
e li rintocchi  
di 'na campana sularìna  
chi chiama li genti  
a la priera.

## PASSARI

Cu lu so' ciuciulu,  
a dui, a tri,  
a cinqu, a deci,  
s'arricampanu  
li pássari.

Ora  
chi lu suli si curcau  
e la sira  
allonga li so' vrazza,  
tornanu a la casa:  
cercanu, tra li frunni,  
risettu  
pi la notti.



## CURTILI A LU MUNTI

Un purtuni apertu...  
e lu sguardu curiusu  
chi trasi e chi talia:  
lu puzzu  
cu lu càtu e lu cuverchiu;  
la scala  
c'acchiana stritta e dritta  
o' primu pianu;  
la giaghètta e li balati;  
li ciureri ('na fudda)  
c'alleggranu 'u curtili.  
E lu pulitu  
'n terra, nte mura, nt'all'aria,  
a tutti banni,  
chi tinci di splinnùri  
tutti cosi.

## L'URTIMU SUDURI

Cu li scali  
appujati all'arvuli,  
all'addritta,  
addinucchiati nta la nuda terra,  
cogghinu l'olivi  
li viddani.  
Masculi e fimmini,  
chistu è l'urtimu suduri  
doppu lu travagghiu  
di 'n'annata.  
Poi...  
la màcina!  
E l'occhiu risulenti  
pi l'ogghiu  
chi jnchi  
giarri e dammiciani.

## JARDINU

Zappuni,  
frisicedda,  
'u me' suduri,  
e,  
tempu 'i nenti  
lu jardu  
s'annittau di l'ervi.  
Ora ridi:  
pari  
un picciutteddu assistimatu  
vistutu  
cu li robbi  
di la festa.

## ARBA A LA MARINA

S'astutaru 'n celu  
l'urtimi lanterni  
e, leggiu leggiu,  
un chiaruri cumpari  
a lu livanti.  
'Na vava 'i ventu  
chi cala di li munti,  
'ncrispa lu mari cu la so' carizza  
e annaca adaciu  
li varchi addurmisciuti.  
Si chiamanu tra d'iddi  
'i piscatura:  
Moviti 'Ntoni,  
'a matinata è netta!  
Prestu Pippinu,  
sugnu nta la varca!  
Susi Turiddu,  
a mumentu è jornu!

.....  
L'arba sunau lu sbigghiarinu  
e va parlannu  
di lu jornu novu.

## PORTA TRAPANI A ERICI

'N arcu,  
'na strata...  
Un campanili  
c'acchiana 'n celu  
suvrastannu casi.  
Mura di petra,  
balatatu 'n terra,  
girani russi  
supra li barcuna.  
A cantunèra  
un fanaluni tantu.  
E li culura  
di la storia antica.